

四庫全書

集部

欽定四庫全書

御定佩文齋詠物詩選卷一百一
集部

詳校官侍郎臣李封
主事銜臣徐以坤覆勘

總校官檢討臣何思鈞

校對官中書臣高中

謄錄監生臣葉世華

欽定四庫全書

御定佩文齋詠物詩選卷三百三十四

木棉花類

附撞花

七言絕句

曲池陪宴即事上竇中丞

唐熊孺登

水自山阿繞座來珊瑚臺上木棉開欲知舉目無情罰

一片花流酒一桮

二月一日雨寒

宋楊萬里

姚黃魏紫向誰賒
郁李櫻桃也沒些
却是南中春色別
滿城都是木棉花

潮惠道中

宋劉克莊

春深絕不見妍華
極目黃茅際白沙
幾樹半天紅似染
居人云是木棉花

思明州

元陳孚

毒蟲含弩滿汀沙
荒艸深眠十丈蛇
遙望天邊紅似火
瘴雲飛落木棉花

嶺南雜錄

明 汪廣洋

石鼎微熏茉莉香，椰瓢滿貯荔枝漿。
木棉花落南風起，

五月交州海氣涼

古耶道中有懷

明 陳憲章

翠烟浮壘麥初齊，社樹青青獨鳥啼。
何處相思不相見，木棉花下水門西。

晚次安南呂塊站

明 許天錫

瓊雲歸路正匆匆，十里官亭坐晚風。
何事最關孤客思，

數聲啼鳥木棉紅

田家即事

明唐時升

棟花菽菽柳鈍鈍犬吠西鄰餉麥蚕雨過木棉齊放葉

相邀作社到城南

附槿花

五言古

種槿花

元陳高

炎方有槿樹衣被代蠶桑舍西得閒園種之漫成行苗

生初夏時料理晨夕忙揮鋤向烈日灑汗成流漿培根
澆灌頻高者三尺強鮮鮮綠葉茂燦燦金英黃結實吐
秋葩皎潔如雪霜及時以收斂采采動盈筐緝治入機
杼裁剪為衣裳御寒類挾纊老稚免淒涼豪家植花卉
紛紛被垣牆于世竟何補爭先翫芬芳棄取一何異感
物增惋傷

御定佩文齋詠物詩選卷三百三十四

欽定四庫全書

御定佩文齋詠物詩選卷三百三十五

竹類

五言古

詠竹

齊 謝 胲

窗前一叢竹青翠獨言奇南條交北葉新筍雜故枝月光踈已密風來起復垂青扈飛不礙黃口得相窺但恨從風擗根株長別離

秋竹曲

謝朓

姪娟綺裯北結根未參差從風既裊裊映日頗離離欲
求棗下吹別有江南枝但能凌白雪貞心蔭曲池

賦得竹

梁元帝

嶰谷管新抽淇園節復修作龍還葛水為馬向并州柯
亭臨絕澗桃枝夾細流冠學芙蓉勢花堪威鳳遊邛王
若有獻張騫應拜侯

簷前竹

梁沈約

萌開籜已垂結葉始成枝繁蔭上鬱鬱促節下離離風
動露滴瀝月照影參差得生君戶牖不願夾華池

綠竹

梁吳均

嬪娟障綺殿繞弱拂春漪何當達採拾為君笙與箏

和新浦侯齋前竹

梁江洪

本生出高嶺移賞入庭蹊檀欒拂桂撩菊葱傍朱闌夜
條風析析曉葉露淒淒籜紫春鶯思筠綠寒蟬啼不惜
凌雲茂遂聽羣雀棲願抽一莖實試看翔鳳來

賦得山中翠竹

陳張正見

修竹映巖垂來風異夾池複澗藏高節重林隱勁枝雲
生龍未上花落鳳將移莫言棲嶰谷伶倫不復吹

賦得夾池修竹

陳賀循

綠竹影參差歲蕤帶曲池逢秋葉不落經寒色詎移來
風韻晚徑集鳳動春枝所欣高臨客未待伶倫吹

詠竹

北齊蕭放

懷風枝轉弱防露影逾濃既來丹穴鳳還作葛陂龍

賦得臨池竹應制

唐虞世南

蕙翠捎雲質垂彩映清池波泛含風影流搖防露枝龍鱗漾峯谷鳳翅拂漣漪欲識凌冬性惟有歲寒知

與東方左史虬修竹篇

唐陳子昂

龍種生南岳孤翠鬱亭亭峰嶺上崇翠煙雨下微冥夜聞鼯鼠叫晝聒泉壑聲春風正澹蕩白露已清冷哀響激金奏密色滋玉英歲寒霜雪苦含彩獨青青豈不厭凝冽羞比春木榮春木有榮歇此節無彫零始願與金

石終古保堅貞不意伶倫子吹之學鳳鳴遂偶雲和瑟
張樂奏天庭妙曲方千變簫韶亦九成信蒙雕斲美常
願事仙靈驅馳翠虬駕伊鬱紫鸞笙結交嬴臺女吟弄
昇天行携手登白日遠遊戲赤城低昂玄鶴舞斷續彩
雲生永隨衆仙逝三山遊玉京

慈姥竹

唐李白

野竹攢石生蒼煙映江島翠色落波深虛聲帶寒早龍
吟曾未聽鳳曲吹應好不覺蒲柳彫貞心常自保

對新篁

唐韋應物

新綠苞初解嫩氣筍猶香含露漸舒葉抽叢稍自長清晨止亭下獨愛此幽篁

顏侍御廳叢篁詠送薛存誠

唐盧綸

玉幹百餘莖生君此堂側拂簾寒雨響擁砌深谿色何事鳳凰離茲焉理歸翼

竹

唐張南史

竹價長東南別種殊草木成林處處雲抽筍年年玉天

風起成韻池水涵更綠閒臨瘦信園數竿心自足

竹

唐戴叔倫

卷簷正離披新枝復蒙密翛翛月下聞裊裊林際出豈
獨對芳菲終年色如一

竹谿

唐李益

訪竹越雲崖即林若谿絕寧知修幹下漠漠秋苔潔清
光溢空曲茂色臨幽澈采摘愧芳鮮奉君歲暮節

竹逕偶作

唐權德輿

退朝此休沐閉戶無塵氛支策入幽逕清風隨此君琴觴恣偃仰蘭蕙相氤氳幽賞方自適林西煙景曛

新栽竹

唐白居易

佐邑意不適閑門秋草生何以娛野性種竹百餘莖見此谿上色憶得山中情有時公事暇盡日繞欄行勿言根未固勿言陰未成已覺庭宇內稍稍有餘清最愛近牕卧秋風枝有聲

酬元九對新栽竹有懷見寄

白居易

昔我十年前與君始相識會將秋竹心風霜侵不得始
嫌梧桐樹秋至先改色不愛楊柳枝春來軟無力憐君
別我後見竹長相憶常欲在眼前故栽庭戶側分手今
何處君南我在北吟我贈君詩對之心惻惻

題小橋前新竹招客

白居易

鴈齒小紅橋垂檐低白屋橋前何所有苒苒新生竹皮
開拆褐錦節露抽青玉筠翠如可殮粉霜不忍觸間吟
聲未已幽翫心難足管領好風煙輕欺凡艸木誰能有

月夜伴我林中宿為君傾一杯狂歌竹枝曲

東樓竹

白居易

瀟灑城東樓遙樓多修竹森然一萬竿白粉封青玉卷簾睡初覺欹枕看未足影轉色入樓牀席生浮綠空城絕賓客向夕彌幽獨樓上夜不歸此君留我宿

竹窓

白居易

常愛輞川寺竹窓東北廊一別十餘載見竹未曾忘今春二月初卜居在新昌未暇作廄庫且先營一堂開牕

不糊紙種竹不依行意取北檐下窓與竹相當遙屋聲
淅淅逼人色蒼蒼烟通杳靄氣月透玲瓏光是時三伏
天天氣熱如湯獨此竹牕下朝廻解衣裳輕紗一幅巾
小簾六尺牀無客盡日靜有風終夜涼乃知前古人言
事頗諳詳清風北牕卧可以傲羲皇

郵竹

唐元稹

庭有蕭蕭竹門有聞聞騎鶯靜本殊途因依偶同寄亭
亭乍干雲嫋嫋亦垂地人有異我心我無異人意

寺院新竹

元 稹

寶地琉璃坼紫苞琅玕踴亭亭巧於削一一大如拱冰
碧林外寒峰巒眼前聳槎枒矛戟合屹仡龍蛇動煙泛
翠光流歲餘霜彩重風朝竽籜遇雨夜鬼神恐佳色有
鮮妍修莖無擁腫節卽高迷玉簇籜綴疑花捧詎必太山
根本自仙壇種誰令植幽壤復此依閒冗居然霄漢姿
坐愛藩籬壅噪集劙鷗鳥炎昏繁蟻蠓未遭伶倫聽非
安子猷寵威鳳來有時虛心豈無奉

新竹

唐 陸龜蒙

別鳴破苔蘚嚴城樹軒楹恭聞稟璇璣化質離青冥色
可定難頸實堪招鳳翎立窺五嶺秀坐對三都屏晴月
窈窕入曙煙霏微生昔者尚借宅况來處賓庭金罍縱
傾倒碧露還鮮醒若非抱苦節何以偶惟馨徐觀稚龍
出更賦錦苞零

新竹

唐 皮日休

笠澤多異竹移之植後楹一架三百本綠沈森冥冥圓

緊珊瑚節釤利翡翠翎儼若青帝仗蠶如紫姑屏槭槭
微風度漠漠輕靄生如神語釣天似樂奏洞庭一翫九
藏冷再聞百骸醒有根可以執有籧可以馨願稟君子
操不敢先彫零

寒竹

唐僧皎然

襄襄孤生竹獨立山中雪蒼翠搖勁風嬋娟帶寒月狂
花不相似還共凌冬發

竹軒

宋司馬光

茲軒最灑落歷歷種琅玕正晝薄雲稀蕭蕭風雨寒翠
陰涼宴坐疎韻成清歡錦籜裁夏扇玉筍供春盤蜻蛚
潛葉底暝雀投林端幽興遇物愜高懷隨處安且免一
日無何須千畝寬

新竹

宋朱子

春雷殷檐際幽艸齊發生我種南窗竹戢戢已抽萌坐
獲幽林賞端居無俗情

風竹如水聲

金蔡珪

好竹風淅淅流水聲泠泠吾廬兼有此要是佳友生北
牕午夢斷冷簟無飛蠅端疑故人至喚作寒泉鳴攬衣
起徘徊自笑還自驚無須問形似自可名雙清

題朱邸竹木

元虞集

猗猗淇園竹結根盤石安枝幹相扶持風雨不可干其
實鳳所食君子思保完恒恐聲影疎蕭條霜露寒金玉
慎高節千載承清歡

題竹

明吳寬

翛然數君子落落俱長身東家每借看步去不嫌頻移
裁幸許我已自前年春自我得此輩園居豈為貧但憂
積雨霽日暴少精神終然勤灌溉枝葉還如新因茲悟
為學黽勉在斯晨

七言古 附長短句

賦得堦前嫩竹

陳正見

翠竹梢雲自結叢輕花嫩筍欲凌空砌曲橫枝屢解籜
堦前疎葉強來風欲知抱節成龍處當於山路葛陂中

綠竹引

唐宋之間

青谿綠潭潭水側修竹嬋娟同一色徒生仙實鳳不遊
老向空山人詎識妙年秉願逃俗紛歸卧嵩丘弄白雲
含情傲睨慰心目何可一日無此君

竹

一字至
七字

唐
張南史

竹竹被山連谷出東南殊艸木葉細枝勁霜停露宿成
林處處雲抽筍年年玉天風乍起爭韻池水相涵更綠
却尋瘦信小園中閒對數竿心自足

刑部看竹效孟郊體

宋歐陽修

花妍兒女姿開落一何速竹比君子德猗猗寒更綠京
師多名園車馬紛馳逐春風紅紫時見此蒼翠玉凌亂
迸青苔蕭疎拂華屋森森日影間濯濯生意足幸此接
清賞寧辭薦芳釀黃昏人去鎖深廊枝上月明春鳥宿

野竹

元吳鎮

野竹野竹絕可愛枝葉扶疎有真態生平素守遠荆榛
走壁懸厓穿石罅虛心抱節山之阿清風白月聊婆娑

寒梢千尺將如何渭川淇澳風煙多

畫竹

元 吳 鎮

與可畫竹不見竹東坡作詩忘此詩高麗老蘭冰雪古
戲寫歲寒巖壑姿紛紛蒼霞落碧篠謾謾好風扶舊枝
綈綈頭角易變化細聽夜深雷雨時

綠筠軒為姚宰作

明 蕭 執

綠筠隱隱翳窗戶此是姚侯讀書處搖空翡翠晚宜人
食實鸞鳳曉相語稚子牽衣惜春露候卒編籬護秋雨

何當便棄人間事抱琴走覓湖山住

過華端叔草堂寫晴竹於壁上

明 王 紩

我愛君家遠城郭遶檐竹色侵簾幕醉中揮翰寫晴梢
湘雲一剪春陰薄看來頓覺風氣清耳邊恍若聞秋聲
嘯歌到晚不歸去高卧翠陰呼月明

五言律

和黃門盧侍御詠竹

唐 張九齡

清切紫庭垂葳蕤防露枝色無玄月變聲有惠風吹高
節人相重貞心世所知鳳凰佳可食一去一來儀

嚴鄭公宅同詠竹

唐杜甫

綠竹半含籜新梢纔出牆色侵書幌晚陰過酒樽涼雨
洗娟娟淨風吹細細香但令無剪伐會見拂雲長

和徐侍郎中書荊篠韻

唐蔣渙

中禁夕沈沈幽篁別作林色連雞樹近影落鳳池深為
重凌霜節能虛應物心年年承雨露長對紫庭陰

和王相公題中書荒竹寄上元相公

唐郎士元

多時仙徑裏色並翠琅玕
幽意含煙月清陰比蕙蘭枝
繁分露重葉老愛天寒
竟日雙鸞止孤吟為一看

池上竹

唐楊巨源

一荒蟬娟色四面清冷波氣潤
晚煙重光間秋露多翠筠
筠入疎柳清影拂圓荷
歲晏琅玕實心期有鳳過

新竹

唐元稹

新篁繞解籜寒色已青葱冉冉偏凝粉蕭蕭漸引風扶
踈多透日寥落未成叢唯有團團節堅貞大小同

題劉秀才新竹

唐杜牧

數莖幽玉色曉夕翠煙分聲破寒魄夢根穿綠蘚紋漸
籠當檻日欲礙入簾雲不是山陰客何人愛此君

栽竹

杜牧

本因遮日種却似爲谿移歷歷羽林影踈疎煙露姿蕭
颸寒雨夜敲訪晚風時故國何年到塵冠挂一枝

竹逕

唐薛能

盤逕入依依旋驚幽鳥飛尋多苔色古踏碎籜聲微鞭
節橫妨戶枝稍動拂衣前谿聞到處應接釣魚磯

新栽竹

唐杜荀鶴

剗破莓苔地因栽十數莖颶風從此冷詩思當時清酒
入杯中影棋添局上聲不同桃與李瀟灑伴書生

庭竹

唐李咸用

嫩綠與老碧森然庭砌中坐消三伏景吟起數竿風葉

影重還密梢聲遠或通更期春共看桃映小花紅

庭竹 唐李中

偶自山僧院移歸傍砌栽好風終日起幽鳥有時來篩
月牽詩興籠煙伴酒杯南窓睡輕起蕭颯雨蘚迴

新竹 唐張蠭

新鞭暗入庭初長兩三莖不是他山少無如此地生垂
梢荒上出柔葉籜間成何用高唐峽風枝掃月明

賦竹 南唐孫覲

萬物中瀟灑修篁獨逸羣貞姿曾冒雪高節欲凌雲細
韻風初發濃煙日正曛因題偏惜別不可暫無君

和謝仲弓廷評栽竹

宋梅堯臣

移得谿邊翠來為庭下陰惜根存舊土帶筍助新林暗
換蕭蕭葉知虛寸寸心東風莫搖撼培擁未應深

次韻子由綠筠堂

宋蘇軾

愛竹能延客求詩剝挂牆風梢千纛亂月影萬夫長谷
鳥驚棋響山蜂識酒香只應陶靖節會聽北窗涼

對竹

元黃庚

門對南隣竹青青玉萬竿雖然無地種且得隔籬看露葉晴猶濕風枝夏亦寒但教休剪伐日用報平安

寄題竹軒

元杜本

綠竹翛翛處華軒楚楚深暮留鵠宿曉聽蟄龍吟月進牕櫺隱雲移几席陰居然淇澳趣莫使俗塵侵

盆竹

元僧善住

瓦缶不多土娟娟枝葉蕃豈知公鳳尾元是古龍孫蒼

雪灑禪榻細香浮酒尊王猷來此見應亦為銷魂

竹戶

明楊慎

竹戶少塵埃濃陰鬱不開靜聞清露墜涼送好風來鳥
下彈瓊粉蟲行篆紫苔無人共欣賞坐嘯獨悠哉

竹亭

明僧德祥

滿園惟種竹竹裏置幽亭犬吠青松路人來白鷺汀花
溝安釣艇蕉地著茶餅老耳思鳴鳳何當借此聽

五言排律

沈十四拾遺新竹生讀經處同諸公之作

唐王維

閒居日清淨修竹自檀欒嫩節留餘籜新粧出舊闌細
枝風響亂疎影月光寒樂府裁龍笛漁家伐釣竿何如
道門裏青翠拂仙壇

同郭叅謀題崔僕射淮南節度使廳前竹

唐劉長卿

昔種梁王苑今移漢將壇蒙龍低冕遇青翠捲簾看得

地移根遠經霜抱節難開花成鳳實嫩筍長魚竿藹藹
軍容靜蕭蕭郡宇寬細音和角暮踈影上門寒湘浦何
年變山陽幾處殘不知軒屏側歲晚對袁安

賦得竹箭有筠

唐 席 謾

共愛東南美青青歎有筠貞姿衆木異秀色四時均枝
葉當無改風霜豈憚頻虛心如待物勁節自留春鮮潤
期棲鳳嬪娟可並人待看初籜卷粉澤更宜新

杜中丞書院新移小竹

唐 王 建

此地本無竹遠從山寺移經年求養法隔日記澆時嫩
綠卷新葉殘黃收故枝色驚寒不動聲與靜相宜愛護
出常數稀稠看自知貧家緣未有客散獨行遲

題盧秘書夏日新栽竹二十韻

唐白居易

湘竹初封植盧生此考槃久持霜節苦新託露根難等
度須當砌疎稠要滿欄買憐分薄俸裁稱作閒官葉剪
藍羅碎莖抽玉琯端幾聲清淅瀝一簇綠檀欒未夜青

嵐入先秋白露團拂肩搖翡翠熨手弄琅玕韻透牕風
起陰鋪砌月殘炎天聞覺冷窄地見疑寬梢動勝搖扇
枝低好挂冠碧籠煙幕幕珠灑雨珊瑚晚簾晴雲展陰
牙熱虺蟠愛從抽馬策惜未截魚竿松韻徒煩聽桃天
不足觀梁慚當家杏臺陋本司蘭撐撥詩人興勾牽酒
客歡靜連蘆簟滑涼拂葛衣單豈止消時暑應能保歲
寒莫同凡草木一種夏中看

賦得震為蒼筤竹

唐朱慶餘

為擢東方秀蕭然異衆筠青葱繞映粉蒙密正含春嫩
籜霑微雨幽根絕細塵乍憐分徑小偏覺帶煙新結實
皆留鳳垂陰似庇人願為竿在手深水釣頰鱗

新竹

唐 李建勲

裊裊薰風軟娟娟湛露光參差仙子仗迤邐羽林槍迥
去侵花地斜來破蘚牆籜乾猶抱翠粉膩若塗粧逕曲
莖難數陰疎葉未長嬾嫌吟客倚甘畏夏蟲傷映水如
爭立當軒自著行北亭樽酒興還為此君狂

七言律

竹

唐崔涯

領得谿風不放廻
傍窗緣砌徧庭栽
行招野客為鄰住
看引山禽入郭來
幽院獨驚秋氣早
小門深向綠陰開
誰憐翠色兼寒影
靜落茶甌與酒杯

和令狐舍人酬峰上人題山欄孤竹

唐楊巨源

滿院冰姿粉籜殘
一莖青翠近簾端
離荒自欲親香火

抱節何妨共歲寒、能讓繁聲任真籟。解將孤影對芳蘭，
范雲許訪西林寺。枝葉須和彩鳳看。

南庭竹

唐 李紳

東南舊美凌霜操、五月凝陰入座寒。煙惹翠梢含玉露，
粉開春籜聳琅玕。莫令戲馬兒童見、試引為龍道士看。
須信結根香實在、鳳凰終擬下雲端。

鄰人自金仙觀移竹

唐 李遠

移居新竹已堪看、斲破莓苔得幾竿。圓節不教傷粉籜，

低枝猶擬拂霜壇
牆頭枝動和煙綠
枕上風來送夜寒
第一莫教漁父見
且從蕭颯滿朱欄

題新竹

唐方干

青苔斲破植貞堅
細碧竿排鬱眼鮮
小鳳凰聲吹嫩葉
短蛟龍尾裏輕烟
節環膩色端勻粉
根拔秋光暗長鞭
怪得入門肌骨冷
綬風粘月滿庭前

越州使院竹

方干

莫見凌風飄粉箨
須知礙石作盤根
細看枝上蟬吟處

猶是筍時蟲蝕痕月送綠陰斜上砌露含寒色濕遮門
列仙終日逍遙地鳥雀潛來不敢喧

竹

唐羅 鄭

翠葉纔分細細枝清陰猶未上階墀蕙蘭雖許相依日
桃李還應笑後時抱節不為霜雪改成林終與鳳凰期
渭濱若更徵賢相好作漁竿繫釣絲

新竹

唐薛 能

抑營茅土倦簾材因向山家乞翠栽清露便教終夜滴

好風疑是故園來
欄邊匠去朱猶濕
溉後蟲浮穴暗開
他日會應威鳳至
莫辭公府受塵埃

題竹

唐秦韜玉

削玉森森幽思清
阮家高興尚分明
捲簾陰薄漏山色
欹枕韻寒宜雨聲
斜對酒缸偏覺好
靜籠棋局最多情
却驚九陌輪蹄外
獨有谿烟數十莖

竹

唐鄭谷

宜煙宜雨又宜風
拂水藏邨復間松
移得蕭騷從遠寺

洗來疎淨見前峰侵堦蘚拆春芽迸繞徑莎微夏蔭濃
無賴杏花多意緒數枝穿翠好相容

洗竹

唐王貞白

道院竹繁教略洗鳴琴酌酒看扶疎不圖結實來雙鳳
且要長竿釣巨魚錦籜裁冠添散逸玉芽修饌稱清虛
有時記得三天事自向琅玕節下書

題友人庭竹

唐殷文珪

荒篁蕭瑟拂清陰貴地裁成碧玉林盡待花開添鳳食

可憐風擊伏龍吟鉢竿離立霜文靜錦緡飄零粉節深
何事子猷偏寄賞此君心似主人心

竹

唐韓溉

綠色連雲萬葉開王孫不厭滿庭栽淒霜盡節無人見
終日虛心待鳳來誰許風流添興詠自憐瀟灑出塵埃
朱門處處多閒地正好移陰覆翠苔

竹

唐李中

森森移得自山莊植向空庭野興長便有好風來枕簟

更無閒夢到瀟湘
廕來砌蘚經踈雨
引下谿禽帶夕陽
閒約羽人同賞處
安排棋局就清涼

次韻劉貢父西省種竹

宋蘇軾

要知西掖承平事
記取劉郎種竹初
舊德終呼名字外
後生誰續笑談餘
成陰障日行當見
取筍供庖計已踈
白首林間望天上
平安時報故人書

次韻何文鎮種竹

宋韓駒

杜陵窮老覓榦栽不似何郎種笛材
三徑莫憂荒艸合

一樽如與故人開未堪急雨枝枝打便有幽禽日日來
坐誦東坡食魚肉詩腸日午轉飢雷

移竹

宋劉克莊

借居未定先栽竹為愛疎聲與薄陰一日暫無能鄙客
數竿雖小亦蕭森總間對了添詩料郭外移來費俸金
自笑明年何處在虛檐風至且披襟

義師院栽竹

宋郭長倩

南軒移植自西壇瘦玉亭亭十數竿得法未應輸老柏

託根兼得近幽蘭雖無穠豔包春色自許貞心老歲寒
百艸千花盡零落請君來向此中看

丹陽觀竹自宮中移賜

金李獻能

素士如林待紫青紫清新許住蓬瀛娟娟粉節霜筠出
矗矗煙梢玉削成福地根莖蒙化育中天雨露借恩榮
綠章封事朝來奏又聽風前彩鳳鳴

竹陰

元白珽

占斷人間瀟灑地全身水墨畫簫箏非煙非霧一林碧

似雨似晴三徑涼翠袖佳人黯空谷白鬚道士隱南塘
數竿醉日君須記移向西軒補夕陽

賦文子方家簫箏竹影

元虞集

數箇簫箏一小亭南窗承日映寒青水精簾裡珊瑚樹
雲母屏前翡翠翎却愛微風動蕭瑟翻疑薄暮倚娉婷
憑君縱有驚谿絹莫與空山結定形

種竹

元洪希文

移得霜根趁雨栽牆陰踏破一方苔甫能引汝清風到

未暇招渠俗子來猿訝便當書案立鶴知早避釣船回
不妨更了歲寒計早晚栽松兼種梅

居竹軒

元倪瓈

翠竹如雲江水春結茅依竹住江濱階前逆筍從侵徑
雨後垂陰欲覆鄰映葉黃鸝還自語傍人白鶴亦能馴
遙知靜者忘聲色滿屋清風未覺貧

僊心寺看竹

明章敞

山深無數碧琅玕愛靜人來取次看地匝翠雲侵骨冷

徑迷蒼雪散天寒風敲玉佩驚清夢月浸金波起宿鶯
我欲平分僧半榻煩君日日報平安

風雨種竹

明

李東陽

石欄沙路雨聲乾為欠蕭蕭一兩竿深帶土膏從地底
暝移茅屋過江干方於辰日依時種影待晴天拂翠看
試倚蓬窗聽疎密布袍沾盡不知寒

竹

明 吳寬

種竹能招鳳鳥來月明清影拂書堆筍鞭過石猶斜出

花米逢春莫亂開此物似賢今合薦吾家醫俗舊曾栽
若後圃論高節梨白桃紅孰取材

種竹

明文徵明

分得亭亭綠玉枝雨餘生意滿階墀凌霄已展疎疎葉
護粉聊營短短籬肯信移來真是醉不愁俗在未能醫
人間此夜頻前席涼月虛窓更自宜

五言絕句

賦得臨池竹

唐太宗

貞條障曲砌翠葉貫寒霜拂牖分龍影臨池待鳳翔

臨階竹

唐盧照鄰

封霜連錦砌妨露拂瑤階聊將儀鳳質暫與俗人諧

竹里館

唐王維

獨坐幽篁裏彈琴復長嘯深林人不知明月來相照

斤竹嶺

唐王維

檀樂映空曲青翠漾漣漪入商山路樵人不可知

斤竹嶺

唐裴迪

明流紓且直綠篠密復深一徑通山路行歌望舊岑

雨後對後檐竹

唐崔元翰

含風搖硯水帶雨拂牆衣乍似秋江上漁家半掩扉

庭竹

唐劉禹錫

露滌鉛粉節風搖青玉枝依依似君子無地不相宜

竹逕

唐韓愈

無塵從不掃有鳥莫令彈若要添風月應除數百竿

竹谿

韓愈

藹藹谿流漫稍稍岸篠長穿沙碧簾淨落水紫苞香

題竹

唐李羣玉

一頃含秋綠森風十萬竿氣吹朱夏轉聲掃碧霄寒

竹

宋徐鉉

勁節生宮苑虛心奉豫遊自然名價重不羨渭川侯

竹

宋朱子

種竹官牆陰經年但憔悴故園新綠多宿幹轉蒼翠

題紙上竹

元鮮于樞

陰涼生研池葉葉秋可數京華客夢醒一片江南雨

一葉竹為竹叟禪師作

元 吳 鎮

誰云古多福三莖四莖曲一葉研池秋清風滿淇澳

岳生畫竹

元 鄭元祐

修篁含雨餘枝拂清風起掃破碧玲瓏高堂淨如洗

荒竹圖

明 高 啓

窈窕復蒙龍千山萬竹中幽人獨驚起秋雨共秋風

略上人房竹

高 啓

幽篠半梢橫山窗颱月明上人禪定久不怕有秋聲

七言絕句

從韋二明府續處覓綿竹

唐杜甫

華軒藹藹他年到綿竹亭亭出縣高江上舍前無此物
幸分蒼翠拂波濤

晚春歸山居題窓前竹

唐劉長卿

谿上殘春黃鳥稀辛夷花盡杏花飛始憐幽竹山牕下
不改清陰待我歸

清水驛荒竹天水趙云余手種一十二莖

唐柳宗元

檐下踈篁十二莖襄陽從事寄幽情祇因更使伶倫見
寫盡雌雄雙鳳鳴

普夸陵幽居

唐李涉

負郭依山一徑深萬竿如束翠沈沈從來愛物多成癖
辛苦移家為竹林

題李次虛廩竹

唐白居易

不用裁為鳴鳳管不須截作釣魚竿千花百草凋零後
畱向紛紛雪裏看

問移竹

白居易

問君移竹意如何慎勿排行但間窠多種少栽皆有意
大都少校不如多

高司馬移竹

唐
馬戴

叢居堂下幸君移翠掩燈窓露葉垂莫羨孤生在山谷
無人看著拂雲枝

竹風

唐 唐彥謙

竹映風牕數陣斜
旅人愁坐思無涯
夜來留得江湖夢
全為乾聲似荻花

庭竹

唐 唐 球

月籠翠葉秋承露
風亞繁稍暝掃煙知道
雪霜終不變
永留寒色在庭前

苦竹徑

唐 陸希聲

山前無數碧琅玕
一徑清森五月寒
世上何人憐苦節

應須細問子猷看

春日山中竹

唐裴說

數竿蒼翠擬龍形
峭拔須教此地生
無限野花開不得
半山寒色與春爭

竹

唐李建勲

瓊節高吹宿鳳枝
風流交我立忘歸
最憐瑟瑟斜陽下
花影相和滿客衣

竹

唐陳陶

不厭東谿綠玉君天壇雙鳳有時聞一峰曉似朝仙處
青節森森倚絳雲

其二

須題內史琅玕塢幾醉山陽琴瑟邨剝養萬莖將掃俗
莫教凡鳥鬧雲門

其三

一谿雲母間靈花似到封侯逸士家誰識雌雄九成律
子喬丹井在深涯

其四

嘯入新篁一里行
萬竿如甕鎖龍泓
驚巢翡翠無尋處
間倚雲根刻姓名

其五

青嵐埽亞思吾祖
綠潤偏多憶蔡邕
長聽南園風雨夜
恐生鱗甲盡為龍

其六

迸玉閑抽上釣磯
翠苗番次脫霞衣
山童泥乞青驄馬

騎過春泉掣手飛

其七

一節呼龍萬里秋數莖垂海六鼈愁更須瀑布峰前種
雲裏闌干過子猷

其八

丘壑誰堪話碧鮮靜尋春圃認嬋娟會當小殺青瑤簡
圖寫龜魚把上天

其九

玄圃千春閉玉堦淇陽一祖碧雲空不須騷屑愁江島
今日南枝在國風

對竹

唐李中

懶穿幽徑衝鳴鳥忍踏清陰損翠苔不似閒閒倚枕聽
秋聲如雨入軒來

竹林

宋林逋

寺籬斜夾千梢翠山磴深穿萬籜乾却憶貴家廳館裏
粉牆時畫數莖看

壬戌正月晦與仲元自淮上復至齊安

宋 王安石

風暖紫荆處處開
雪乾沙淨水洄洄
意行却得前年路
看盡梅花看竹來

霜筠亭

宋 蘇 輾

解籜新篁不自持
婵娟已有歲寒姿
要看凜凜霜前意
須待秋風粉落時

橫山堂

宋 孫 靖

蒼雲十畝蔭平寬露葉風枝繞舍寒莫遣先生賦歸去
且令小吏報平安

新竹

宋閼名

根露蒼龍脊骨寒葉盤丹鳳尾梢端風雷未化秋塘影
魚鼈長猜是釣竿

細香軒

金路鐸

霜雪青青玉一蓑肯從堯李借薰釀不知香界何從立
憑仗清風問籜龍

墨竹

金龐鑄

一谿流水玉涓涓
谿上修篁接暮煙
誰倩能詩文與可
筆端移得小江天

其二

瀾川急雨暗秋空
無限琅玕淡墨中
劒甲挺挺軍十萬
欲將貔虎戰斜風

琳宮詞

元
許有壬

涼入簾幙夜色輕
瑤臺添月更虛明
一壺天地渾無迹

只有清風動竹聲

扇上竹

元 楊 輽

種竹何須種萬竿
一枝分影亦檀樂
秋宵更受風披拂
聽取清音入夢寒

題金顯宗畫墨竹

元 柳 貫

海潤星輝大定年
生綃筆筆寫蒼煙
若為夢裏貰簷谷
直到洋州雪筏邊

墨竹

元 歐陽玄

兩枝淡淡與濃濃垂葉應無霜靡容玉立滿身都是雨
何人能識葛陂龍

題竹石圖

元陳旅

藍田水曲青玉立雨過秋光滿林濕故人結屋傍幽崖
靜愛石牕晴翠入

題雨竹

陳旅

江上鷓鴣留客住黃陵廟下泊船時一林春雨垂垂綠
消得晴風爛熳吹

題王虛齋所藏鎮南王墨竹

元納 延

帝子乘鸞謁紫清滿天風露翠衣輕間將十二參差玉

吹向雲間作鳳鳴

蘇東坡竹

元 吳 鎮

晴梢初放葉可數新粉纔消露未乾太似美人無俗韻

清風徐灑碧琅玕

蘇東坡竹

元 黃公望

一片湘雲濕未乾春風吹下玉琅玕強扶殘醉揮吟筆

簾帳蕭蕭翠雨寒

題柯敬仲竹

元台哈布哈

梁王宅裏參差見山簡池邊爛熳栽記得九宵秋月上

滿庭清影覆蒼苔

題柯學士畫竹

元陳基

羣玉仙人佩水蒼金莖分露服琳瑯曾將天上昭華琯
吹作飛龍奉玉皇

遵道竹枝

元張雨

貧簷谷口白雲生
雲裏琅玕萬玉聲
驚破幽人春枕夢
一窗斜月半梢橫

題雲林竹

明 張簡

笠澤莊頭道士家
書牕風竹翠交加
新梢便有凌雲勢
高出牆檐掃落花

題宋好古墨竹

明 危素

我憶東曹粉署郎
琅玕寫就拂雲長
祗疑散步雲林曲
獨聽秋聲待晚涼

早朝待漏題楊諭德竹

明 王 遂

禁鐘繞動曉風微
新竹疎疎對瑣闈
不是日高簾不捲
怕教空翠濕朝衣

題竹

明 王 紱

宮樹棲鴉拜夕郎
洞門煙靄竹蒼蒼
珮聲搖曳歸來晚
香篆初消月滿牀

竹

明 徐 渭

昨夜牕前風月時
數竿踈影響書幃
今朝搨向谿藤上

猶覺秋聲筆底飛

題薛淡園墨竹

明 僧道衍

淡淡煙中映夕曛
疎疎石上拂晴雲
展圖却憶西岡夜

坐聽秋聲亦有君

題王黃鵠墨竹

明 僧德祥

輞川竹裏舊題詩
畫裡如今似見之
滿耳秋聲人不到

彈琴長嘯月來時

御定佩文齋咏物詩選卷三百三十五

欽定四庫全書

御定佩文齋詠物詩選卷三百三十六

筍類

五言古

食筍

唐
白居易

此州乃竹鄉春筍滿山谷山夫折盈把抱來早市鬻物以多為賤雙錢易一束置之炊甌中與飯同時熟紫箨拆故錦素肌擘新玉每食遂加飮經時不思肉久為京

洛客此味常不足且食勿踟蹰南風吹作竹

和黃魯直食筍次韻

宋蘇軾

飽食有殘肉飢食無餘菜紛然生喜怒似被狙公賣邇
來誰獨覺凜凜白下宰一飯在家僧至樂甘不壞多生
味蠹簡食筍乃餘債蕭然映樽俎未肯雜菘芥君看霜
雪姿童稚已耿介胡為遭暴橫三嗅不忍嘬朝來忽解
籜勢迫風雷噫尚可餉三間飯箇纏五米

食筍十韻

宋黃庭堅

洛下斑竹筍花時壓鮭菜一束酬千金掉頭不肯賣我
來白下聚此族富庖宰烹栗戴地翻盤觫觸牆壞膾膾
入中厨如償食竹債甘菹和菹耳辛腊肺薑芥烹鷄雜
股掌炮鼈亂羃介小兒哇不美鼠壤有餘喂可貴生於
少古來食共噫尚想高將軍五谿無人采

蕭巽葛敏修二學子和予食筍詩次韻答之

黃庭堅

北饌厭羊酪南庖豐筍菜自北初落南幾為兒所賣習

知價廉平百態事烹宰鹽晞枯腊瘦蜜漬真味壞就根
煨茁美豈念炮烙債咀吞千畝餘胃次不薦芥二妙各
能詩才名動江介詩論多佳句贈炎甘我喙因君思養
竹萬籟聽秋噫從此繕藩離下令禁漁米

食新筍

元
岑安卿

黃蘶甕已竭枯脯筐亦空老芥長芒刺食久咽為痛山
雨拆竹胎未入春盤供畦丁適踵門致我親戚送脫絆
錦紋散切玉霜刀弄新香散湯鼎饑涎迸齒縫未憊搜

詩腸已破食肉夢參禪誠滑稽煮筭宜笑鬪贊寧譜亦
佳涪翁句堪誦僻居東海偏斯味時一中山僧應獻餐
飽食聽春哢

七言古

雙箏歌送李回兼呈劉四

唐李頤

並抽新筍色漸綠迥出空林雙碧玉春風解籜雨潤根
一枝半葉青露痕為君當面拂雲日孤生四遠何足論
再三抱此悵為別嵩洛故人與之說

宋

食筍行

唐庚

半夜春山試雷雨驚起蟄龍初出土野人不惜蒼苔古
掘得嘉餐自燒煮滿盤明玉遠飄風一箸鱸魚味差苦
竹齋食罷竹陰午竹裏行吟傲簪組君誇食肉君固卑
我誇食筍我亦癡阿蠻豐肌飛燕瘦意態艷異要皆奇
君不見天隨先生貧食杞又不見闕中客卿肥刺齒豐
儉不齊皆有理彼此相忘聊爾耳

苦筍

宋陸游

藜藿盤中忽眼明駢頭脫襁白玉嬰極知耿介種性別
苦節乃興生俱生我覺魏徵殊媚嫵約束兒童勿夕取
人才自古要養成放使干霄戰風雨

謝唐德明惠筍

宋楊萬里

高人愛筍如愛玉忍口不餐要添竹云何又遣十輩來
昏花兩眼為渠開販夫束縛向市賣外強中乾美安在
錦紋猶帶落花泥不論燒煮兩皆奇豬肝累人真可怍
以筍累公端不惡

食筍

元 劉因

夢迴齒頰風蕭騷
幽姿不許霜松高
南來蒼玉不盈束
已覺飲興翻雲濤
詩家胷次自宜此
尚嫌煙火湏烹魚
想像南風吹萬竹
籜龍正恐稱冤號
石盆養魚心自苦
仰羨鶴鵠雲間巢
眼中歲旱土不膏
長鑣後慮山無毛
退食歸來北牕夢
山巔朱鳳聲噭噭

筍

元 吳鎮

綠陰晝靜南風來
晴梢拂拂煙花開
籜龍走地牙角出

班班玉立橫蒼苔長鐮穿雲石路滑錦衣脫柂玉版白
鳴牙未下冰雪鑿開籠先放楊州鶴

食燒筍畱題陳惟寅竹間

明楊基

春雷一聲萬簪玉參差亂迸莓苔綠斬來掃葉當境燒
何異燃箕煮秋菽登盤查牙玉版肥焦尾碎破蒼龍皮
山人大嚼無以報寫作林間燒筍詩

新筍歌

明岳斌

滿林黃鳥不勝啼林下新筍與人齊春風閉門走山兔

白晝露滴驚竹雞雨中三日春已過又近石牀添幾箇
競將頭角向青雲不管階前綠苔破

五言律

籬筍

唐 李頤

東園長新筍映石復穿籬迸出依青嶂攢生伴綠池密
因林向背行逐地高卑但恐春將老青青獨爾為

五言排律

和侯協律詠筍

唐 韓愈

竹亭人不到新笋滿前軒乍出真堪賞初夕未覺煩成
行齊婢僕環立比兒孫驗長常攜尺愁乾屢側盆對吟
忘膳飲偶坐變朝昏滯雨膏腴濕騎陽氣候溫得時方
張王挾勢欲騰騫見角牛羊沒看皮虎豹存攢生猶有
隙散布忽無垠詎可持籌算誰能以理言縱橫公占地
羅列暗連根狂劇時穿壁羣強幾觸藩深潛如避逐遠
去苦追奔始訝妨人路還驚入藥園萌芽防寢大覆載
莫偏恩已復侵危砌非徒出短垣身寧虞瓦礫計擬揜

蘭蓀且歎高無數庸知上幾番短長終不較先後竟誰論外恨芑藏密中仍節目繁暫湏迴步履要取助盤飧穰穰疑翻地森森競塞門戈矛頭戢戢蛇虺首掀掀婦懦咨料棟兜癡謁盡髡侯生來慰我詩句讀驚魂屬和才將竭呻吟至日暾

七言律

聞開元寺開筭園寄章上人

唐皮日休

園鎖開聲駭鹿羣滿林蘚擗水犀文森森競泣林梢雨

雙嶺爭穿石上雲並出亦如鶯管合各生還似犬牙分
折煙束露如相遺何屑明朝不如葷

食筍

宋 曾幾

花事闌珊竹事初一番風味殿春蔬龍蛇戢戢風雷後
虎豹斑斑霧雨餘但使此君常有子不憂每食歎無魚
丁寧下里湏畱取障日遮風却要渠

都下食筍自十一月至四月戲題

宋 楊萬里

竹祖龍孫渭上居供儂樽俎半年餘班衣戲綵春無價
玉版談禪佛不如若怨平生食無肉何如陋巷飯斯蔬
不湏庾韭元修菜喫到憎時始憶渠

食燒筍

金郝天挺

煨拙舊聞山谷語勸耕還憶大蘇詩傳將火候無多訣
畱得天真又一奇未放錦綺開束縛已看玉版證茶毘
白麻初拜驚燒尾見此應慚富貴癡

佩之惠筍乾自稱玉版老師謂原博冬筍為吳

山少俊疊韻奉謝

明 李東陽

玉版山深石路開東軒真被籠盛來飽諳南國煙霞味
不入長安酒肉堆老覺禪心終苦淡瘦看詩骨共崔嵬
叢林年少休相笑脫却褊衣更懶裁

答于喬次韻謝送冬筍

明 吳寬

西郭清風暮壁開門前俗物敢持來聊供香飯杪雲子
為想長鎌斲雪堆空腹冷含金瑣碎壯心未怯玉崔嵬
知君能畫非饑守乞與鴟鴞絹剪裁

行根笋

明 朱之蕃

琅玕林立拂雲高
詰屈盤根茁上膏
龍尾掛崖鷹攫爪
鳳味銜石蠣舒螯
清陰只擬過鄰屋
玉版何期飫老饕
好待春雷抽犧角
長鑑不用費爬搔

筍

朱之蕃

龍孫頭角奮春雷
葛徑穿林破綠苔
已放琅玕摩碧漢
聊從玉版薦金罍
煮泉清入詩脾健
噴飯香傳笑口開
清味不妨頻作供
萬竿煙雨為栽培

賜鮮筍

明于慎行

殊錫先生玉筭班曾從青簡賦檀樂蒲筐乍解香盈座
錦緡初分綠滿盤一飯疑含仙禁雨三秋猶憶北牕寒
慚無鳳寶儀千仞祝有龍孫長萬竿

五言絕句

新筍

宋朱子

翛翛江上林白日暗風雨下有萬玉虬三冬卧寒土

筍脯

朱子

南山春筍多萬里行枯腊不落盤餐中今知綠如簣

筍

元 鄭允端

竹林春雨過瘦筍迸苔長坐待成高節清標出短牆

內中偶述

明 徐禎卿

朱宮殊方貢黃旗使者回內園春未到青筍渡江來

六言絕句

看筍六言

宋 楊萬里

筍如勝薛爭長竹似夷齊獨清只愛錦綳滿地暗林忽

兩三莖

七言絕句

昌谷北園新筍

唐李賀

箨落長竿削玉開君看母筍是龍材更容一夜抽千尺
別却池園數寸埃

其二

斫取青光寫楚詞賦香春粉黑離離無情有恨何人見
露壓煙啼千萬枝

初食筍呈座中

唐

李商隱

嫩籜香苞初出林五陵論價重如金皇都陸海應無數
忍剪凌雲一寸心

筍

宋 王禹偁

昨夜春雷逆蘚痕亂披煙籜出柴門稚川龍過應迴首
認得青青幾代孫

謝惠猫兒頭筍

宋 蘇軾

長沙一日煨籜筍鷓鴣洲前人未知走送煩公助湯餅

猫兒突兀竄穿籬

筍

宋

朱松

一雷驚起籜龍兒戢戢滿山人未知急喚蒼頭斬煙雨
明朝吹作竹參差

次韻謝劉仲行惠筍

宋朱子

誰寄寒林新斲筍開奩喜見白差差知君調我酸寒甚
不是封侯食肉姿

御定佩文齋詠物詩選卷三百三十六

欽定四庫全書

御定佩文齋詠物詩選卷三百三十七

牡丹花類

五言古

白牡丹

唐 白居易

城中看花客旦暮走營營素華人不顧亦占牡丹名
在深寺中車馬無來聲唯有錢學士盡日遶叢行憐此
皓然質無人自芳馨衆嫌我獨賞移植在中庭留景夜

不暝迎光曙先明對之心亦靜虛白相向生唐昌玉藥
花攀翫衆所爭折來比顏色一種如瑤瓊彼因稀見貴
此以多為輕始知無正色愛惡隨人情豈惟花獨爾理
與人事并君看入眼者紫豔與紅英

七言古

和李中丞慈恩寺清上人院牡丹花歌

唐權德輿

淡蕩韶光三月中牡丹偏自占春風時過寶地尋香徑

已見新花出故叢曲水亭西杏園北濃芳深院紅霞色
擢秀全勝珠樹林結根幸在青蓮域豔藥鮮房次第開
含烟洗露照蒼苔龐眉倚杖禪僧起輕翅紫枝舞蝶來
獨坐南臺時共美閒行古刹情何已花間一曲奏陽春
應為芬芳比君子

遠公亭牡丹

唐
李咸用

雁門禪客吟春亭牡丹獨逞花中英雙成膩臉偎雲屏
百般姿態因風生延年不敢歌傾城朝雲暮雨愁娉婷

藥繁蟻脚粘不行蝶迷蜂醉飛無聲廬山根脚含精靈
發妍吐秀叢君庭溢江太守多閒情欄朱繞絳留輕盈
潺潺綠醴當風傾平頭奴子啾銀笙紅葩艷藍文童星
左文右武憐君榮白銅堤上慙清明

朝元宮白牡丹

元宋 裴

瑤圃廓落崑崙高霓旌豹節凌旋颺東門偷種來塵囂
開雲鏤月百千瓣雪痕冰瑩辭鏤凋重臺複榭玉版白
濕露擁出青霞嬌瓊娥愛春受春足香腴酥膩愁風消

人間洛陽紅紫妖紫霞灑灑吹秦簫青鸞望極何當招

同院僚觀閣中牡丹作

明

唐順之

西掖衡連翡翠城籠烟裊霧百花明祇謂紫薇方吐萼
忽言紅藥已敷英紅藥歲蕤豔盛陽萬年春色在文昌
寧同鄰下芙蓉苑詎比雒陽桃李場裁成異瓣千般錦
纈就同心一樣黃金閣披時渾是畫綺樓凝處并疑妝
濯枝故向鳳池上裛露偏依仙掌傍仙掌嶙峋對鳳池
詞郎侍直驚鵠齊玲瓏玉珮花間映飄曳羅衫葉下迷

花間葉下情無極含笑含嬌似相識羞將雞舌鬪馨香
欲取羈冠並顏色翠幕分看態轉新朱欄斜倚不勝春
未採孤根助靈液聊持芳藥贈佳人

五言律

詠牡丹未開者

唐
韓 琮

殘花何處藏盡在牡丹房嫩葉包金粉重葩結繡囊雲
凝巫峽夢簾閉景陽妝應恨年華促遲遲待日長

牡丹

唐
裴 說

數朵欲傾城安同桃李榮未嘗貧處見不似地中生此
物疑無價當春獨有名遊蜂與蝴蝶來往自多情

白牡丹

唐王貞白

穀雨洗纖素裁為白牡丹異香開玉合輕粉泥銀盤曉
貯露華濕宵傾月魄寒佳人淡妝罷無語倚朱欄

李才元寄示蜀中花圖

宋范鎮

自古成都勝開花不似今徑圍三尺大顏色幾重深未
放香噴雪仍藏葉散金要知空相諭聊見主人心

和仲常牡丹詩

元王惲

漢殿承恩早，金盤薦露新。
色酣中省樂，香重錦窠春。
儘羣芳後，誰辭載酒頻。
清如司馬相，也作插花人。

五言排律

和王郎中召看牡丹

唐姚合

葩疊萼相重燒，欄復照空妍。
姿朝景裏醉，豔晚烟中乍。
怪霞臨砌還疑燭，出籠繞行驚。
地赤移坐覺，衣紅殷麗開。
繁朵香濃發，幾叢裁綃樣。
豈似染茜色，寧同嫩畏人。

看損鮮愁日炙融蟬娟涵宿露爛熳抵春風縱賞襟情
合間吟景思通客來歸盡嬾鶯戀語無窮萬物珍那比
千金買不充如今難更有縱有在仙宮

牡丹

唐薛能

異色稟陶甄常疑主者偏衆芳殊不類一笑獨夸妍顆
坼羞含嬾蘂虛隱隔圓亞心堆勝被美色豔於蓮品格
如寒食精光似少年種堪收子子價合易賢賢迴秀應
無妬竒香稱有仙深陰宜映幕富貴助開筵蜀水爭能

染巫山未可憐數難忘次第立因憇傍邊逐日愁風雨
和星祝夜天且從閏盡賞離此便歸田

賦牡丹

元貢奎

曲檻春如錦晴開曉日妍樹搖風影亂枝滴露光圓玉
珮停湘女金盤拱漢仙翠填宮鬢巧黃染御袍鮮力費
青工造名隨綺語傳細翎層擁鶴弱翅獨迎蟬倚竹成
雙立留花任衆先久看心已倦欲折意還憐洛譜今存
幾吳園路憶千可應頻載酒相與醉華年

七言律

戲題牡丹

唐韓愈

幸自同開俱隱約何須相倚鬪輕盈凌晨併作新妝面
對客偏含不語情雙燕無機還拂掠遊蜂多思正經營
長年是事皆拋盡今日欄邊眼更明

牡丹

唐薛能

去年零落暮春時淚濕紅牋怨別詩常忍便同巫峽散
因何重有武陵期傳情每向馨香得不語還應彼此知

欲就闌邊安枕席夜深閒共說相思

牡丹

薛能

牡丹愁為牡丹飢自惜多情欲瘦羸濃豔冷香初益後
好風甘雨正開時吟蜂遍坐無閒葉醉客曾偷有折枝
京國別來誰占覩此花光景屬吾詩

牡丹

唐
溫庭筠

水漾晴紅壓疊波曉來金粉覆庭莎裁成豔思偏應巧
分得春光數最多欲綻似含雙脣笑正繁疑有一聲歌

華堂客散簾垂地想凭欄干斂翠娥

牡丹

唐韓琮

桃時杏日不爭濃葉帳陰成始放紅曉艷遠分金掌露
暮香深惹玉堂風名移蘭杜千年後貴擅笙歌百醉中
如夢如仙忽零落暮霞何處綠屏空

牡丹

唐方干

不逢盛暑不衝寒種子成叢用法難醉眼若為拋去得
狂心更擬折來看凌霜烈火吹無焰裏露陰霞曬不乾

莫道嬌紅怕風雨，經時猶自未凋殘。

牡丹

方干

借問庭芳早晚裁，座中疑展畫屏開。
花分淺淺燕支臉，葉墮殷殷膩粉腮。
紅砌不須誇芍藥，白蘋何用逞重臺。
慙慚為報看花客，莫學遊蜂日日來。

牡丹

唐
李山甫

邀勒春風不蚤開，衆芳飄後上樓臺。
數苞仙蕊火中出，一片異香天上来。
曉露精神妖欲動，暮烟情態恨成堆。

知君也解相輕薄斜凭闌干首重迴

牡丹

唐羅隱

似共東風別有因絳羅高捲不勝春若教解語應傾國
任是無情亦動人芍藥與君為近侍芙蓉何處避芳塵
可憐韓令功成後辜負穠華過此身

牡丹

唐秦韜玉

坼妖放豔有誰催疑就仙中旋折來圖把一春皆占斷
故留三月始教開壓枝金葉香如撲逐朵檀心巧勝裁

好是酒闌絲竹罷，倚風含笑向樓臺。

僧舍白牡丹

唐 吳 融

膩若裁雲薄，綴霜春殘獨自嬈。羣芳梅妝向日霏，霏暖紈扇搖風閃。閃光月魄照來空見影，露華凝後更多香。天生潔白宜清淨，何必殷紅映洞房。

其二

侯家萬朵簇霞丹，若並雙林素豔難合影。只應天際月分香，多是畹中蘭。雖饒百卉爭先發，還在三春向後殘。

想得惠休憑此檻肯將榮落意來看

紅白牡丹

吳 融

不必繁絃不必歌
靜中相對更情多
殷鮮一半霞分綺
潔澈旁邊月颶波
看久願成莊叟夢
惜留須倩魯陽戈
重來應共今來別
風墮香殘襯綠莎

趙侍郎看紅白牡丹因寄楊狀頭贊圖

唐 殷文珪

遲開都為讓羣芳
貴地裁成對玉堂
紅豔裊裊烟疑欲語

素華映月只聞香剪裁偏得東風意淡薄如矜西子妝
雅稱花中為首冠年年長占斷春光

再看光福寺牡丹

唐劉兼

去年曾看牡丹花蝶蝶迎人傍綠霞今日再遊光福寺
春風吹我入仙家當筵芬馥歌脣動倚檻嬌羞醉眼斜
來歲未朝京闕去依前和露載歸衙

追和白舍人詠白牡丹

唐徐夤

蓓蕾抽開素練囊瓊葩薰出白龍香裁分楚女朝雲片

剪破嫦娥夜月光
雪句豈須徵柳絮
粉腮應恨貼梅妝
檻邊幾笑東籬菊
冷折金風待降霜

尚書座上賦牡丹
花得輕字其花自越中移植

徐 黃

流蘇凝作瑞華精
仙閣開時麗日晴
霜月冷銷銀燭焰
寶甌圓印綵雲英
嬌含嫩臉春妝薄
紅蘸香綃豔色輕
早晚有人天上去
寄他將贈董雙成

嚴相公宅牡丹

宋徐鉉

但是豪家重牡丹爭如丞相閣前看鳳樓日暖開偏早
難樹陰濃謝更難數朵已應迷國豔一枝何幸上塵冠
不知更許憑欄否爛熳春光未肯殘

畫錦堂再賞牡丹

宋韓琦

錦堂重賞牡丹紅不惜殘英數日空嘉豔豈無來歲好
清歡難得故人同誰言山下曾為雨只恐身輕去逐風
且共對花開笑口莫持姚左較雌雄

答西京王尚書寄牡丹

宋歐陽修

新花來遠喜開封呼酒看花興未窮年少曾為洛陽客
眼明重見魏家紅却思初赴青油幕自笑今為白髮翁
西望無由陪勝賞但吟佳句想芳叢

和君貺寄河陽侍中牡丹

宋司馬光

真宰無私姪煦同洛花何事占全功山河勢勝帝王宅
寒暑氣和天地中盡日玉盤堆秀色滿城繡縠走春風
謝公高興看春物倍憶清伊與碧嵩

宿新豐坊詠瓶中牡丹因懷故園

宋楊萬里

客子泥塗正可憐天香國色一枝鮮雨中晚斂寒如此
燭底宵暄笑粲然自覺玉容微婉軟急將翠掌護嬋娟
江南也有新豐市未羨賓王酌聖賢

賦益公平園牡丹白花青綠 楊萬里

東陽封作萬花王更賜珍華出上方白玉杯將青玉酒
碧羅領襯素羅裳古來洛口元無種今日天心別作香
塗改歐家紀文看此花未出說姚黃

應制粉紅雙頭牡丹

金党懷英

卿雲分瑞兩嫣然
鏡裏妝成穀雨天
曉日倚闌爭妬豔
春風拾翠兩駢肩
水南水北何曾見
桃葉桃根本自仙
夢想沈香亭北檻
略修花譜紀芳妍

其二

春意應嫌芍藥遲
一枝分秀伴雙蕤
並肩翠袖初酣酒
對鏡紅妝欲鬪奇
上苑風煙工獻巧
中天雨露本無私
更看散作人間瑞
萬里黃雲來兩岐

五月牡丹應制

金 趙秉文

好事天工養露芽
陽和趁及六龍車
天香護日迎朱輦
國色閏春待翠華
縠雨曾霑青帝澤
薰風又卷赤城霞
金槃薦瑞休嗟晚
猶是人間第一花

次韻楊司業牡丹

元 吳 澄

誰是舊時姚魏家
喜從官舍得奇葩
風前月下妖嬈態
天上人間富貴花
化魄他年鎖子骨
點脣何處箭頭砂
後庭玉樹聞歌曲
羞殺陳宮說麗華

謝吳宗師送牡丹并柬伯庸尚書

元虞集

輕風紫陌少塵沙
忽見金盤送好花
雲氣自隨仙掌動
天香不許世人誇
青春有態當窗近
白髮多情插帽斜
最愛尚書才思別
解吟蝴蝶出東家

牡丹花

元胡天游

相逢盡道看花歸
慙媿尋芳獨後時
北海已傾新釀酒
東風猶鏽半開枝
掃空紅紫真無敵
看到雲仍未可知

但願倚欄人不老為公長賦謫仙詩

和李別駕賞牡丹

元高明

絳羅密幄護風沙
莫遣牛酥汚落花
蝶夢不知春已暮
鶴翎還似暖生霞
詩呈金字懷仙客
手印紅脂出內家
獨羨沈香李供奉
清平一曲度韶華

賦素軒沐公家牡丹一首和楊彥謐韻

明郭登

淺紅深碧畫難分
左紫姚黃未足云
五色應將靈藥染

三生曾用妙香熏枝頭直訝妝成錦夢裏還疑化作雲
不與羣芳競開落任教蜂蝶自紛紛

賞牡丹呈席上諸友

明 錢 洪

國色天香映畫堂茶簾芍藥避芬芳日熏絳幄春酣酒
露洗金盤曉試妝三月繁華傾洛下千年紅豔怨沈香
看花判泥花神醉莫惹春愁點鬢霜

牡丹

明 張 淮

綠雲堆裏露精神依約如羞認未真開落後天皆有數

品題先漢却無人
金鈴送響多驚鳥
翠幄圍嬌不受塵
何處託根偏得地
年年獨讓魏家春

牡丹

明

吳寬

嫣然國色眼中來
紅玉分明簇一堆
寢愛倚闌如欲語
緣知舉酒特先開
洛中舊譜頭須接
吳下新居手自裁
若向花間求匹配
揚州瓊樹是仙材

五言絕句

渾侍中宅牡丹

唐劉禹錫

徑尺千餘朵人間有此花今朝見顏色更不向諸家

牡丹

唐

司空圖

得地牡丹盛曉添龍麝香主人猶自惜錦幕護春霜

雙頭牡丹

宋

夏竦

紅芳爭並萼網葉競駢枝彩鳳雙飛穩霞冠對舞遲

七言絕句

賞牡丹

唐劉禹錫

庭前芍藥妖無格池上芙蓉淨少情唯有牡丹真國色

花開時節動京城

看憚家牡丹花戲贈李二十

唐白居易

香勝燒蘭紅勝霞
城中最數令公家
人人散後君須看
歸到江南無此花

贈李十二牡丹花片因以餞行

唐元稹

鶯澀餘聲絮墮風
牡丹花盡葉成叢
可憐顏色經年別
收拾朱欄一片紅

西明寺牡丹

元稹

花向琉璃地上生光風炫轉紫雲英自從天女盤中見
直至今朝眼更明

牛尊師宅看牡丹

唐段成式

洞裏仙春日更長翠叢風剪紫霞芳若為簫史通家客
情願扛壺入醉鄉

白牡丹

唐韋莊

閨中莫妬新妝婦陌上須慙傅粉郎昨夜月明渾似水

入門唯覺一庭香

題牡丹

唐盧士衡

萬葉紅綃剪盡春丹青任寫不如真風光九十無多日
難惜樽前折贈人

白牡丹

唐裴潾

長安豪貴惜春殘爭賞新開紫牡丹別有玉盤承露冷
無人起就月中看

題牡丹

唐蒼頭捧鈔

一種芳菲出後庭却輸桃李得佳名誰能為向天人說
從此移根近太清

白牡丹

宋歐陽修

蟾精雪魄孕雲英春入香腴一夜開宿露枝頭藏玉塊
暖風庭面倒銀杯

奉陪穎叔賦欽院牡丹

宋沈遼

昔年曾到洛城中玉椀金盤深淺紅行上荆谿谿畔寺
愧將白髮對東風

和仲良催看黃才叔秀才南園牡丹

宋楊萬里

愁雨閑花花已闌作晴猶喜兩朝寒山城春事無多子
可緩黃園看牡丹

湖上

宋方岳

今歲春風特地寒百花無賴已摧殘馬塍曉雨如塵細
處處筠籃賣牡丹

雲龍川泰和殿五月牡丹

金章宗

洛陽穀雨紅千葉
嶺外朱明玉一枝
地力發生雖有異
天公造物本無私

新開牡丹

元 刘秉忠

四月新來三月還
一春光景鏡中看
東風也逐情濃處
吹落桃花放牡丹

趙中丞折枝牡丹圖

元 馬祖常

洛陽春雨濕芳菲
萬斛臘脂染舞衣
帳底金盤承蜜露
東家蝴蝶不須飛

歐陽公牡丹詩

元
歐陽玄

盛遊西洛方年少晚樂漁樵號醉翁白首歸來玉堂署
君王殿後見韃紅

宮詞

明
薛蕙

禁闈處處鎖名花步障層層簇絳紗斟酌君恩似春色
牡丹枝上獨繁華

牡丹

明
馮琦

百寶闌干護曉寒沈香亭畔若為看春來誰作韶華主

總領羣芳是牡丹

其二

數朵紅雲靜不飛
含香含態醉春暉
東皇雨露知多少
昨夜風前已賜絳

御定佩文齋詠物詩選卷三百三十七

欽定四庫全書

御定佩文齋詠物詩選卷三百三十八

芍藥花類

五言古

直中書省

齊謝朓

紫殿肅陰陰彤庭赫弘敞風動萬年枝日華承露掌玲瓏結綺錢深沈暎朱網紅藥當階翻蒼苔依砌上茲言翔鳳池鳴佩多清響信美非吾室中園思偃仰朋情以

鬱陶春物方駘蕩安得凌風翰聊恣山泉賞

戲題堦前芍藥

唐柳宗元

凡卉與時謝妍華麗茲晨欹紅醉濃露窈窕留餘春孤
賞白日暮暄風動搖頻夜窗藹芳氣幽卧知相親願致
溱洧贈悠悠南國人

紅芍藥

唐元稹

芍藥綻紅綃色籬織青瑣繁絲蹙金葉高峩當爐火剪
刻形雲片開張赤霞裏烟輕琉璃葉風亞珊瑚朵受露

色低迷向人嬌婀娜酡顏醉後並小女妝成坐豔豔錦
不如夭夭桃未可晴霞畏欲散晚日愁將墮結植本為
誰賞心期在我采之諒多思幽贈何由果

七言古

新安芍藥歌送胡伯恭之蔡源

元袞 梧

洛陽花枝如美人點點不受塵土嗔輕紅深白鑄顏色
高亞綠樹爭精神那如新安紅芍藥透日千層光閃爍

碧雲迸出紫瑠璃風動霓裳凝綽約我聞種花如種玉
盡日陰晴看不足微雲淡蕩增寵光細雨輕濛賜湯沐
何人看花不解理香雪紛紛手中毀酒酣跌宕空低昂
得意須臾竟如此翩翩驪騁雲中君愛花直欲留青春
青春如流欲歸去明年看花君合住

五言律

芍藥

唐張九齡

仙禁生紅藥微芳不自持幸因清切地還遇藍陽時名

見桐君錄香聞鄭國詩孤根若可用非直愛華滋

蘇子川宅觀芍藥

明

黎民表

為掩羣芳色開花獨後時青扶承露葉紅妥出闌枝綽約東隣子風流鄭國詩合歡還有恨名字是將離

芍藥

明 眇石

春色今方滿名花爾較遲含芳如有意呈彩亦當時調鼎需仙液揮毫停鳳池天工知不淺一夜露華滋

五言排律

草詞畢遇芍藥初開因詠小謝紅藥當堦翻詩
以為一句未盡其狀偶成十六韻

唐白居易

罷草紫泥詔起吟紅藥詩詞頭封送後花口坼開時坐
對鉤簾久行觀步履遲兩三叢爛熳十二葉參差背日
房微斂當階朵旋欹釵萼抽碧股粉藥撲黃絲動蕩情
無限低斜力不支周廻看未足比喻語難為勾漏丹砂
裏焦燒火燄旗彤雲贊根蒂絳幘欠纓綉况有晴風度

仍兼宿露垂凝香熏罨畫似淚著胭脂有意流連我無
言怨思誰應愁明日落如恨隔年期菡萏泥連萼玫瑰
刺繞枝等量無勝者惟眼與心知

七言律

芍藥

宋王禹偁

東君留著占殘春得得遲開亦有因曾與掖垣留故事
又來淮海伴詞臣日燒紅豔排千朵風遞清香滿四鄰
更愛綠頭弄金縷異時相對掌絲綸

其二

滿院勾開似赤城帝鄉齊點上元燈感傷綸閣多情客
珍重維揚好事僧酌處酒杯深蘸甲折來花朵細含稜
老郎為郡摹朝寄除却吟詩百不能

北第同賞芍藥

宋韓琦

芍藥名高致亦難此觀妖豔滿雕闌酒酣誰欲張珠網

醉西施

金細偏宜間寶冠

金線冠

冠子露裏更深雲髻重

髻子蝶樓

長苦玉樓寒

樓子

鄭詩已取相持贈不見諸經載牡丹

玉盤盂

宋蘇軾

雜花狼籍占春餘芍藥開時掃地無兩寺妝成寶瓔珞
一枝爭看玉盤盂佳名會作新翻曲絕品難尋舊畫圖
從此定知年穀熟姑山親見雪肌膚

彭孝求以綠野行送芍藥數種鄙句為謝

宋周必大

占斷春光及夏初琉璃剪葉采珊瑚休論花品同而異
共詠詩人樂且訏北第莫辭金鑿落南禪爭看玉盤盂

彭宣徵恙何妨醉自有嬌癡婢子扶

多稼亭前兩檻芍藥紅白對開二百朵

宋楊萬里

紅紅白白定誰先
嫋嫋娉娉各自妍
最是倚欄嬌分外
却緣經雨意醒然
晚春早夏渾無伴
暖豔晴香正可憐
好為花王作花相
不應只遣侍甘泉

論花者牡丹
王芍藥近侍

芍藥

元郝經

夜來風雨洗殘春
芍藥還開春又新
入座忽驚持酒客

舉杯先酌送花人烟輕雪膩丰茸質露重霞香婀娜身
鐵石肝腸總銷鑠却將軟語說風神

王叔能宅芍藥

元馬祖常

鶯粉分奩艷有光天工巧製殿春陽霞繒襞積雲千疊
寶盞凝脂蜜半香並蒂當階盤綬帶金苞向日剖珠囊
詩人莫詠揚州紫便與花王可頡頏

陪宴相府得芍藥花有感賦

元張昱

醉吐車茵愧不才馬前蝴蝶趁花回玉餅盛露扶春起

錦帳圓燈照夜開垂白敢思潦酒贈欹紅還是廟廊裁
揚州何遜空才思惟對高寒詠閣梅

芍藥

明 吳 寛

品高真自廣陵來舊譜空餘壁角堆千葉連雲如並擁
兩枝迎日忽齊開詩中相謔何須贈擔上能賒也用裁
記取今年纔看起醉吟多藉麴生材

五言絕句

芍藥

金 姚孝錫

綠萼披風瘦紅苞浥露肥只愁春夢斷化作彩雲飛

七言絕句

芍藥

唐韓愈

浩態狂香昔未逢紅燈爍爍綠盤龍覺來獨對情驚恐
身在仙宮第幾重

芍藥

宋蘇軾

倚竹佳人翠袖長天寒猶著薄羅裳揚州近日紅千葉
自是風流時世妝

謝趙生惠芍藥

宋陳師道

九十風光次第分
天憐獨得殿殘春
一枝勝欲簪雙髻
未有人間第一人

過廣陵值早春

宋黃庭堅

春風十里珠簾捲
彷彿三生杜牧之
紅藥梢頭初蘸粟
揚州風動鬢成絲

五月芍藥

元馬祖常

紅芍花開端午時
江南遊客苦相疑
上京不是春光晚

自是天家日景遲

漂京雜詠

元楊允孚

東風亦肯到天涯燕子飛來相國家若較內園紅芍藥

洛陽輸却牡丹花

內園芍藥遠望亭亭直上數尺許花大如斗揚州芍藥稱第一終不及上

京也

其二

時雨初肥芍藥苗脆甘味壓酒腸消揚州簾卷東風裏

曾惜名花第一嬌

草地芍藥初生軟美居人多采食之

芍藥

明 高啟

昔年花發要人催
今日人稀花自開
獨有園丁憐國色
時容閒客借看來

題芍藥

明 僧德祥

玉階宜有此花開
金鼎調香宰相才
莫謂人間無彩筆
寫將穰豔入雲臺

御定佩文齋詠物詩選卷三百三十八